


## 1866 – Uorden u statuts da vischnaunca - Emprema constituziun

*Il cantun pretenda dallas vischnauncas grischunas ina constituziun. Tujetsch fa buca preschuna per quella lavur e lai spitgar il cantun tochen che quel fa matei empau squetsch. La finala surdat ins ad in gerau da rimnar tuts reglaments ed uordens existents e metter ensemen ils «Statuts dalla vischnaunca da Tujetsch».*

### Status dalla vischnaunca da Tujetsch

Uorden u statuts da vischnaunca, tatgs ord ils protocols, fatgs, revedi ed acceptai dalla vischnaunca 1866.



### Statuts generals

#### I. Radunonzas dils vischins (vischnaunca)

§ 1. La vischnaunca da Tujetsch formescha ina part dil circuit dalla **Cadi**. Ils dretgs che compateschan alla vischnaunca tenor constituziun vegnan executi entras las radunonzas dils vischins da vischnaunca.

§2. La vischnaunca fa en sias radunonzas tras il pli dils leu presents vischins ils statuts e las reglas da vischnaunca, ella legia ora sia suprastanza, las necessarias cumissiuns e ses officials; decretescha las necessarias taglias da vischnaunca e nominescha ed approbescha l'administraziun dils officials e prosequescha il dretg da prender si vischins e votescha sur dils pugns da recapitulaziun.

§3. La vischnaunca vegn clamada ensemen tras igl obercheit aschi savens sco quel anfla per necessari. Ils vischinadis da **Rueras**, **Selva** e **Tschamut** ston vegir avisai avon, cun excepziun dils dis che tuts vischinadis ein obligai da vegnir ella farria.

§4. Las radunonzas dalla vischnaunca vegnan menadas digl empren gerau (*president*), il qual tegn in exact protocol sur tuttas ordinaziuns da quella. Il protocol duei sin l'emprema suandonta vischnaunca vegnir legius avon e suttamess alla approvaziun da quella.

#### II. La suprastanza u obercheit da vischnaunca

§5. La suprastanza da vischnaunca consista ord nov commembers, numnadamein, treis geraus, sis cussegliers, cumpru il stalter e salter. In ord ils sis cussegliers, numnadamein quel che habitescha il pli damaneivel dil derschader d'ingant, duei funcziunar sco salter ed in ord ils auters tschun persunals sto far stalter, nunsavend denter els sedecider, ston sesuttametter alla sort.

Elecziuns

a) ils treis geraus e sis cussegliers

b) la cumissiun da scola da sis commembers ed il segnerfarrer sco president

- c) la cumissiun pauperila da siat commembers, cumpriu il segnerfarrer
  - d) la cumissiun per ir atras ils quens da vischnaunca
  - e) mintga quater onns vegn elegiu in gerau militar (vide folia sias obligaziuns)
- Quels vegnan eligi mintg'onn, Gliendisdis Tschuncheismas, per in onn (resalvond il gerau militar)

§6. Ils geraus vegnan saramentai sin vischnaunca entras igl empren gerau cass.

Sarament. Vus sco elegi geraus vegnis ad engirar tier Diu il Tutpussent, che vus leies cunscienzusamein administrar e survegilar ils beins e la polizia da vischnaunca e leies executur exactamein e nunpartischond las concernentas leschas ed ordinaziuns dil cantun e dalla vischnaunca ed en tuts graus schilunsch sco ei schai en vies uffeci, suenter meglier saver e puder schurmegiar ed augmentar ils interess dalla vischnaunca.

Plaids dil sarament. Tut quei ch'ei a mi cun ils plaids e jeu hai bein entelgiu, vi jeu vegnir suenter e salvar cun ils fatgs suenter miu meglier saver e puder, tuttas caussas a bunafei senza malart, aschia pilver mei gidi Dieus, la sontgissima Trinitad, Nossadunna e tut ils sogns. Amen.

### **Regulativ dallas fatschentas**

§7. 1. Igl obercheit ha da menar e survegilar l'entira administraziun dalla vischnaunca, d'execuir tuttas conclusiuns e survegilar ch'ils statuts da vischnaunca vegnien observai.

2. Igl obercheit legia ora ils sequents ugaus: Ugau pervenda, ugaus per las caplanias **Rueras, Selva e Sedrun**, ils ugaus da tuttas baselgias, igl ugau dalla spenda da graun, igl ugau dalla spenda da pieun s. Vigeli, igl ugau dils paupers e spenda da sal.

3. Igl obercheit survegilescha l'administraziun dils sura elegi ugaus e pren mintg'onn, entras ils treis geraus cul segnerfarrer, giu ils quens da tuts ugaus, nua ch'ei duei vegnir mirau ch'ils capitals da quellas ugadias vegnan muni cun sufficientes unterpfands.

4. Igl obercheit censurescha tuts surpassaments da statuts e leschas da vischnaunca.

§8. Ils conclus e las ordinaziuns digl obercheit dueien vegnir protocolladas tras il scarvon da vischnaunca, il qual vegn numnaus digl obercheit ord siu miez.

§9. Ils commembers digl obercheit, sco era il salter retilan in salari da 1.50 fl. per di, quels dis ch'ei ston impunder da castigar, dar ora lenna e visitar tetgs e classenas, ultra da quei, dueien ils treis geraus survegnir sco in benefeci, ils cudischs da hipotecas, il cudisch da marcaus ed il procent per rugalar, trer en la taglia cantunala. Per dis, che stuessen necessariamein vegnir impundi per nez e basegns dalla vischnaunca, dueien tenor temps e circumstanzias vegnir indemnisai, il con duei la cumissiun da quens far ora.

§10. Mintg'onn duei igl obercheit Gliendisdis Tschuncheismas dar giu alla vischnaunca quen sur sia administraziun, suenter quei che la cumissiun da treis commembers legi ora leutier dalla vischnaunca ha revediu e verificau quel tier quella cumissiun da quens, dueien vegni elegi ils treis geraus ch'ei passai ora.

Ils quens mess avon vegnan suenter che la cumissiun da revisiun da quels ha dau giu siu rapport alla vischnaunca suttamess all'approbaziun da quella.

§11. Igl obercheit duei en cass ordinaris esser responsabels per ils quens dall'administraziun da vischnaunca; aber buca solidaricamein. Per controllar quens nuncantlis dueien quels vegnir dai en agl obercheit en uffeci, il qual sa en cass da basegns clamar en in commember digl obercheit veder sco informaziun.

§12. Igl ugau pervenda ed ils ugaus dallas caplanias han l'obligaziun da prender entamaun ils quens, quels survegilar ed administrar sco suonda. Els dattan ora mintg'onn als signurs spirituals ina gliesta da lur davers ch'ei sappien sez trer en. Sch'ei vegn dau giu capitals, sche dueien ei quels turnar a metter ora dil meglier ch'ei san adina aber aunc schar dar Unterpfand, duess ei vegnir augmentau ils fondos, seigi tras tscheins ni sin autras modas, dueien

medemamein purtau els quens e sch'ei vegn fatg en daner quel metter en tscheins sco avon detg. Els survigileschan tuts loghens da pervendas e caplanias, che quels vegnien manteni en uorden, e sch'ei fa da basegns da reparaturas grondas, salidar igl obercheit, avon che far far. Era dueien quels esser obligai da survigilar il schischend, quei ein ils funs, che quels vegnien raschuneivlamein starschanai. Mintga ugau duei era survegnir in inventari da quellas varts, il qual duei vegnir purtaus en quest cudisch. Quei inventari duei cuntener:

1. La pervenda ha ina casa a **Sedrun**, tgei mobillas enten quella audan alla vischnaunca, tgei dretgs e regress.
2. La pervenda ha suandonts nuegls e clavaus e nua e tgei dretgs e regress.
3. La pervenda ha il suandont funs, nua, tgei mesira, grass ni magher ed ils cunfins da quei funs.

Il medem cuntegn dueien era ils inventaris dallas caplanias haver.

Schabegiond il cass che la pervenda, ni caplanias duessen esser vacantas, sch'ein ils partenets ugaus obligai da trer en e dar ora tut quei che croda duront quei temps, persunter dueien raschuneivlamein vegnir indemnissai per sias breigias extra, quels ugaus ein obligai da mintg'onn render quen da siu operar sco ils auters ugaus communal.

### **Stalter da vischnaunca**

§13. Il stalter duei vegnir aschigleiti sco igl obercheit ha elegiu quel saramentaus sin vischnaunca digl emprem genau.

Sarament dil stalter. Vos sco elegiu stalter dalla vischnaunca vegnis ad engirar che vus en tut leies encurir e promover il beinstar dalla vischnaunca, tener bein quen da vies prender en e dar ora, haver buna cura da vias, punts e piogns e far buna obedienscha agl obercheit da vischnaunca.

Plaids dil sarament. Sco sura §6. ei da ver.

§14. Il stalter ha da menar ils quens currents dall'administraziun da vischnaunca e retila per sias breigias da trer en 20 raps per tschien francs ed aschia vinavon, sto aber trer en tut current che croda sut el.

§15. El ha da survigilar e menar ora tuttas lavurs cuminas generalas dalla vischnaunca, da tener quen sur da quellas ed ina exacta gliesta.

§16. Il stalter duei mirar che las punts, vias e piogns dalla vischnaunca vegnien mantenidas en bien stan e procurar per il necessari material leutier, principalmein da lennas tras lavur cumina per spagnar expensas pecuniaras da quellas varts alla vischnaunca.

§17. Per mintga di impundius vid lavurs cuminas percepesch'il stalter in salari da 1.50 fl. per di.

§18. Il stalter suplescha en cass da basegns ed assenza il salter.

### **IV. Il salter**

§19. Igl obercheit ha en sia disposiziun il salter, il qual ha da vegnir suenter a tuts camonds da quel e principalmein digl emprem genau, tier il qual el ha da serender ina gada per jamna per retscheiver ses camonds.

§20. Il salter ha da far tuttas citaziuns, visadas e publicaziuns sin ordinaziun digl emprem genau ni digl obercheit, sco era da dumandar sin vischnaunca ils meinis, far si e decider las tscharnas, resalvond tier elecziuns en fatgs cantunals, nua ch'ei vegn numnau dumbnavuschs.

### **B. Statuts specials**

§21. Vischins da vischnaunca pon vegnir pri si mo sut las sequentas cundiziuns:

1. Ston duas tiarzas dils votants esser persunter.
2. Sto il petent pagar en cassa da vischnaunca f. 1000 ed al fondo da scola general era f. 1000.

3. Vulend prender si per da meins, sa mo daventar unanimamein.

§22. Femnas d'autras vischnauncas ch'ei buca burgheisas da cumin, che semaridan cun burgheis da nossa vischnaunca, ston pagar en cassa da scola generala 20 frs. tochen 50 frs.

## I. Beises

§23

Art.1. Als beises (*senza dretg da burgheis, era hinderses*) che tegnan fiug vegn ei concediu

a) la lenna da barschar, sco als auters vischins da vischnaunca, encunter in annual pagament da frs. 5 – 25 tenor taxaziun digl obercheit.

b) per eventual supplement da barschar ei surschau da taxar al cussegl da vischnaunca.

c) lenna da nez sa vegnir concediu per frs. 3 – 6 – 15 per plonta

d) lattas per chischners, Orts san vegnir retratgas encunter fr. 1 - frs. 1.50 per latta

Art.2 Per pasculaziuns da pastiras e pastg cumin pagan ils beises per scadina qualidad da tiers ch'ei vulan guder il dubel arvè da quei che la vischnaunca metta si annullamein per ils tiers ch'auters ch'ils burgheis vegnan en.

Art.3 Tut segar e spelar fein e pastg, far feglia e barba e dascha sin quei dalla vischnaunca ei als jasters scumandau, ei po aber sin dumandar, dalla vischnaunca vegnir concediu encunter pagar, ni era per nuot.

Art.4 Jasters, als quals la vischnaunca sto procurar il turnister per il survetsch militar, ston bonificar per quei alla vischnaunca 5 frs.

Art.5 Ils hinderses ein obligai da pagar per mintga affon da scola quei che porta per affon da reparter sin tuts il salari annual dil scolast.

## II. Attenents

§24. Ils attenents (*confamiliars*) pagan ina tiarza da scadina taxa impundida als beises per il gudiment da beins dalla vischnaunca.

### Vischins d'autras vischnauncas

§25. che setegnan si mo per temps en nossa vischnaunca

a) tals che vischineschan en in'otra vischnaunca e setegnan si tier nus mo per temps, han negins dretgs vid ils beins communal.

b) En cass da reciprocitad (*vicendeivladad*) sa ei a tals vegnir dau lenna da barschar e da nez per baghetgs che schaian sin nies territori encunter bonificaziun.

c) Da schar guder pastiras cun tiers manedels po il cussegl da vischnaunca lubir tochen calonda mars encunter bonificaziun.

§26. El vischinadi ch'ins habitescha e tegn fiug da calonda mars ein ins obligai da purtar tutas grevezias, partenent pastiras, num ch'el havess avon declarau als vischins ch'el midi locaziun.

### Polizia da vischnaunca

§26. Tgi che disturba il ruaus dalla notg croda en castitg digl obercheit.

§27. Il disturbar il survetsch divin vegn medemamein censuraus tras igl obercheit.

### Lavurs cuminas generalas (e da vischins)

§28. 1. Tier lavurs cuminas ei scadin fiug che vegn avisaus obligaus da tarmetter il meglier luvrer dalla casa.

2. Il di da lavur cumina vegn quintaus gl'unviern sis ed auter temps otg uras da lavur.

3. Umens da mistregn ston luvrar en cass da basegns da lur mistregn, vegn lura aber quintaus il dubel.

4. Tier lavurs cuminas vegn in bov quintaus ton sco in um, in pèr bos ni cavagl ton sco dus umens.

5. Tgi che vegn buca sin la secunda visada tier las lavurs cuminas, paga immediat frs. 2 per stad e primavera ed 1.70 frs. pigl unviern.

6. Encunter quei pagament sa il cussegl da vischnaunca era liberar in da lavur cumina, pagond sco sura per di.
7. Tier las lavurs cuminas han da separticipar tuts habitonts da nossa vischnaunca e zuar a norma:
  - a) quels che han negins tiers dumias ni cavals cun in di per roda,
  - b) tuts che possedan tals tiers, bein aber diesch ein obligai dus dis per roda,
  - c) quels che possedan diesch u pli tiers gronds ston purtar treis dis lavur cumina per roda.
  - d) Mintg'onn da calonda mars duei per quei vegnir dils cauvitgs priu si ils tiers, vadials vegnan buca quintai.

## Uorden da scola

§30.

1. Per segirar las scolas elementaras dils differents vischinadis, vegn dalla ludeivla vischnaunca tschentau si mintgamai per dus onns in cussegl da scola da sis commembers ed il segnerfarrer duei esser president da quella autoritad. Tenor circumstanziass san ils signurs caplons, ils ugaus dallas scolas dils vischinadis e lur scolasts vegnir tratgs tier las deliberaziuns.
2. Scadin vischinadi duei leger ora per sia scola in ugau e sch'ei plai era in cussegl da scola che ha da procurar per scolast ed administrar siu fondo, clamar vischins en fatgs da scola, trer en ils daners da scola e pagar il scolast ed haver quitau per ils locals e mobiglias da scola.
3. Mintga scola duei mirar da vegnir tier in agen fondo per susteniment da tuttas, exist'ei denton in communal fondo da vischnaunca che vegn onn per onn carschentauss tras sequentas ordinaziuns:
  - a) Scadin vischin da **Tujetsch** duei avon ch'enzinar en pagar ina taxa da nozzas egl importo da 5 – 10 frs. Mattauns che maridan ord vischnaunca pagan 3 – 6 frs. Setilan vischins d'autras vischnauncas dalla **Cadi** en **Tujetsch** e gaudan cheu las scolas, sche dueien els stuer pagar suenter quella taxa da 5 – 10 frs.
  - b) Per ierta da quels che mieran senza descendenza pagan ils artavels 2 frs. per melli, ei aber igl importo dalla jerta 3000 frs. e varga, sche pagan ei 3 frs. per melli. Excepziunai da quella taxa ei l'ierta da quels, ch'han fatg in legat al fondo comunabel. Tgi che testamentescha mo ad in fondo da vischinadi, ei era libers, mo il respectiv vischinadi sto sin ina moda u l'otra bonificar il legal importo al fondo general (vul dir pro melli).
  - c) Cun cunsentiment dalla vischnaunca sa in vischinadi dar ora enqual tochet pastira, cunzun leu, nua ch'ei sa cheutras vegnir spargnau classenas ed imponer quei vid siu agen fondo da scola.
  - d) Per tuts suloms, che vegnan concedi dalla vischnaunca als particulars, dueien pagar sin prau 50 raps il fest e sin pastiras, nua duei vegnir miserau sulom e regress 1 – 2 frs. il fest e quei al fondo general da scola; alla medema paga scadin puoz niev che vegn cavaus sin pastira 1 fr.
4. La rendita dil fondo communal da scola vegn mintgamai repartius sillas diversas scolas dils vischinadis a norma dils affons che gaudan las scolas, pagan mintgin en siu vischinadi, ni ord il fondo dil vischinadi, per cumpletar il salari dil scolast. Ils affons ch'ein necesitai da frequentar en in unviern duas scolas muort midada da lur domicil, pagan a mintgina suenter temps, sch'ei vegn pretendiu. Affons da beises ei lubiu da metter si in pli grond daner da scola, ton sco ei tuccass a mintg'affon sche leutier paga dil scolast vegness tagliada dils affons, vide §23, artechel 5.
5. Ina gada per onn duei era vegnir dau giu alla vischnaunca il quen da scola. Per engraziament e pia memoria da tuts benefactors da scola duei il cassier dil fondo communal schar leger ina sontga messa e quei tier l'avertura dalla scola, nua ch'ils affons dalla entira vischnaunca sepudend duessen tier quella seradunar en la farria.

6. Quei che va tier l'ulteriura procedura en fatgs da scola han ils geniturs, affons e cussegl da scola da setener vid las ordinaziuns dil niev uorden da scola cantunal.

### Uorden pauperil

§31. Per survegilar e direger il pauperesser vegn ei mintga dus onns legiu ora ina cumissiun pauperila consistenta ord 7 – 10 commembers, il segnerfarrer ei ex officio commember da quella, ed ils signurs caplons san era vegnir tratgs tier, sco era ils ugaus dils paupers e da sal spenda e graun. Quella cumissiun ha d'administrar cunscienziusamein ils beins dalla spenda, da mirar che quels vegnan buca sminui, sunder carschentai. – Els han milsanavon da reparter la rendita dalla spenda als paupers cun particular risguard dils pli basignus e meriteivels.

§32. Tonscha la rendita dil fondo pauperil buc'ora per cuvierer las necessarias expensas dil pauperesser e vul la vischnaunca buca schar ira a rugar, sche vegn ei surschau alla cumissiun d'imponer in'almosna als vischins da vischnaunca e zuar a norma da lur facultad, tenor cadaster cun excepziun d'urgentas circumstanzias. – Renitents san vegnir sfurzai cheutier sin via tschentamentala. Per almosnas dueien il geniturs sez ira e buca tarmetter lur affons. Ella vegn dada en rauba tenor clamada ni en daner.

§33. La cumissiun pauperila legia ora in president pauperil, il qual ha l'immediata survegionza dil pauperesser, el meina las corrispondenzas e quens.

§34. La cumissiun pauperila ha era da disponer sur las pastiras cultivadas dils paupers e quellas tenor beinmanegiar dar ora da guder als paupers ed aschi savens sco ella anfla per bien e necessari prender dad in e dar ad in auter, sco era las pastiras, ch'ei predestinadas da schar segar e spelar ils paupers, ha la cumissiun da disponer e dar a scadin basignus, sco po tucrar ni ils basegns damondan.

Pastiras cultivadas en praus ein las suandontas:

a) Il **Drun** partius giu en sorts, igl entir toc mesira buca tratg giu la crappa .... festes e stauscha sut il **Rein**, dadens **Las Rueras** e particulars, sura prau da particulars, dadora la pastira.

b) *buca nudau enzatgei*

§35. La cumissiun pauperila duei buca mo sustener ils paupers cun almosnas, sunder ella duei era sespruar da stappar si ton sco pusseivel las fontaunas dil pauperissimus, ch'ei il schliet uorden a casa, il levsenn e la munconza da fadigia, la marschadetgna ed il sfarlatar sia rauba per caussas buca necessarias. Per quei intent duei la cumissiun dar als paupers, sch'ella anfla per bien, in curatur che survegn lura era en ses mauns il susteniment, che vegn daus a ses clients e che lai vegnir tier a quels tenor temps e circumstanzias.

§36. Il graun e sal spenda dueien ins buca schar reparter artavels ed adina trer en quei dil possessur digl „unterfand“ (*pègn*). Vegn in tal „unterfand“ vendius ni artaus, sche dueien ils contrahents ni artavels dar en quella midada enteifer 15 dis als ugaus spenda, tgi che lai sut quei, duei pagar 1 fr. castitg alla cassa pauperila.

§37. Paupers u tals che han retratg almosna e mieran giu senza descendenza e laian anavos facultad, dueien stuer pagar anavos alla cassa pauperila quei valzen ch'ei han retratg ord quella.

§38. Igl ugau pauperil tila en il tscheins ed il sal. – Igl ugau spenda tila en ils tscheins ed il dumieci. Il dumieci vegn rimnaus el cumah spenda en disposiziun dalla cumissiun. Ils tscheins annuals en daners surdat el, cura ch'el dat giu quen, alla cumissiun da quens e quella surdat quei agl ugau pauperil, il qual, cugl ugau ensem, repartan ora, (resalvond il sal), als paupers ton daners, sco graun, tenor la gliesta, che vegn ad els consignada dil president ni dalla

cumissiun pauperila, e quei duei daventar regularmein mintga 2 – 3 meins, ni aschi savens sco ils basegns garegian. – Il sal vegn daus ora sulet entras igl ugau pauperil.

§39. Ils ugaus spenda e pauperil ston mintg'onn render quen alla cumissiun da quens, vide §7 art. 3 dil regulativ da fatschentas.

## **Uorden forestal**

### **A. Administraziun**

§40. L'administraziun digl uorden d'uauls en sia entira extensiun vegn surdada al cussegl da vischnaunca cun ils dus ugaus vitier sut il num cumissiun forestala.

§41. La cumissiun forestala ha la survigilonza digl uorden d'uauls, la manutenziun da quel; ella conceda tutta lenna da fiug, sco da nez, ha da decider sur la necessitad dil baghegiar da niev in baghetg veder e reparaturas. Rapporta siu pareri alla vischnaunca tier damondas da baghegiar sin suloms. Ella ha da proponer alla vischnaunca tier l'elecziun dils ugaus d'uauls commensurai persunals, da censurar tuts surpassaments digl uorden forestal, da tener in special cudisch sur la lenna concedida da baghegiar, sco era sur las classenas e da lur midadas en mir ed in protocol suls castitgs.

§42. En disposiziun alla cumissiun vegn tschentau dus ugaus, ils quals vegnan elegi dalla vischnaunca per dus onns sin proposiziun dalla cumissiun forestala. Els vegnan saramentai tras il cussegl da vischnaunca.

§43. Ils ugaus d'uauls han tenor gliesta, che vegn ad els surdada dalla cumissiun, da nudar ora tutta lenna concedida, survigileschan en general ed en special els, tegnan la polizia d'uauls ed annunzian alla cumissiun tuttas transgressiuns (*surpassaments*) digl uorden. – Per mintga di impundius els uauls retilan els 2 frs. per in e di e per in miezdi 1 fr.

§44. Ils ugaus ein obligai da nudar cul marti tutta lenna ch'els dattan ora e quei ton sin la ragisch, sco sil lenn sez. Il marti ein ei obligai da tener sut bien guvern.

### **B. Lenna da barschar e baghegiar**

§45. La lenna da barschar vegn dada ora cun sort; scadina sort duei cuntener aschi tonta lenna sco ina ordinaria famiglia drova. - Drova in vischin ni l'auter necessariamein pli ch'ina sort, sche duei vegnir concediu sco supplement da sort. – Els uauls astga scadin encurir ensemen secca, sco romas, cuschas e draussas, resalvond els loghens scumandai. – Miscalgias astg'ins encurir si en tuts uauls. – Roma astg'ei buca vegnir priu aschiditg sco il lenn ei aunc leu, ni sch'ella fuss messa ensemen.

§46. Il baghegiar sin sulom niev sto ordavon tenor paragraf 41 vegnir renconuschiu il basegns; suenter sa la vischnaunca conceder la lenna ni buca.

§47. Sin sulom veder, tgi che vul pretender lenna, per turnar a far si, sto era dumandar sulom.

§48. Tuts nuegls ston vegnir baghegiar da mir, senz'excepziun; en cass cuntrari, vegn ei dau negina lenna da baghegiar, sco era silsunter negina lenna da mantener tals baghetgs.

§49. Per irals vegn dau dus quaders per far las cassas ed il rest vegn dau ina plonta d'aissas che sto vegnir resgiada e duvrada en quella moda. Era per lattir vegn dau lenna grossa, che sto vegnir resgiada en lattas, essend lattiu, sche d'encarpar giu duei vegnir dau neginas lattas. Era per palancar vegn dau mo lenna grossa, la quala sto vegnir resgiada.

§50. Tutta lenna concedida da baghegiar sto esser en treis onns duvrada tier siu intent, vul dir messa en effect, el cass cuntrari crodan tals en castitg.

§51. Tuttas lennas che vegnan concedidas per vendidas, seigi da baghegiar ni barschar, ston esser dalla concedida naven dad in onn ord igl uaul, nunschabegiond cass inprovedi, el cass cuntrari croda quella lenna anavos en disposiziun dalla vischnaunca ed era la roma sto en dus onns esser ord igl uaul.

§52. Tuts quels che giavischan lenna da baghegiar, ni da reparar, seigi casas, clavaus, chischners etc. sto ordavon far urentar in dalla cumissiun, ni in auter leutier predestinau um e zuar duei vegnir mess in um entelgeivel, che viseti tut, per saver dar a scadin ulivamein quei ch'ei necessari. Quel duei lura rapportar siu pareri alla cumissiun, la quala concluda lura da dar ni buca, sco lura era conta lenna dar a scadin petent. – Per reparar preits da nuegl vegn dau negina lenna. Sco per lenns da punt en baghetgs vegls vegn dau mo in per nuegl, che sa aschia vegnir resgiaus.

§53. Norma co secuntener cun dar lenna, cura ins vul baghegiar casas, nuegls e clavaus tut da niev. Per baghegiar ina casa nova dubla, duas alzadas aulta duei vegnir dau 120 quaders, dus lenns da slondas e sis lenns d'aissas. Quella lenna duei vegnir dada la mesadad ord las schetgas e la mesadad ord ils uauls cumins.

Per baghegiar nuegl e clavau, in baghetg cun dus nuegls da 16 armauls, duei ei vegnir dau per lattir, d'iral, palancar e pinar ora siat lenns d'aissas u slondas, treis ord schetga e quater ord uauls cumins. Per tetgals, cassas d'iral e suppias 10 quaders ord la schetga, lenns da punt ed ischenchels siat ord uaul cumin e da clavau ed insierchels (*enzerchels*) 50 ord uaul cumin. Per chischners novs ni veders duei ei vegnir dau quei ch'ei necessari, aber adina mo ord ils uauls cumins.

## C. Classena

- §54.
1. Tutta lenna da classena sto vegnir dumandada e nudada ora dils ugaus culla marca da marti. Per classena vegn dau lenna grossa, che sto vegnir fendida ni resgiada en lattas, essend che per clauder vegn dau neginas lattas.
  2. Per spartidas denter orts, ni mises, sco era per clauder loghens ch'ein tochen ussa buca vegni cludi, vegn ei dau negina lenna da clauder.
  3. Da cheu naven duei buca vegnir concediu la lenna da clauder ora novs mises, ni pastiras che vegnessen urbarisadas.
  4. Igl „Abfall“ dalla lenna da clauder, quei ei quei che sa buca vegnir duvrau da clauder, sto quel dalla classena prender, tenor la validitaziun da quel che noda ora.

§55. Las classenas da **Maun Sura** en ed ora, ch'ein encunter la pastira vegnan dadas ord ils uauls da **Maun Sura**. Ils pals, sco era las classenas suenter las vias ed autras classenas, vegn dau la lenna necessaria leutier ord ils uauls cumins. – Giu da **Maun Sut** duei vegnir dau la classena mintgamai il pli damaneivel dils praus, resalvond ord igl **Uaul Surrein**.

§56. Tgi che mida la classena da lenn en mir vegn pagaus ord la cassa da vischnaunca per 6 en lunghezia mesira nova, quei fuss aschia 3 bratscha mesira nova, cun 70 cts. L'altezia e la solididad dil mir sto vegnir enconuschius per en uorden e sufficients da quel che mesira, il qual sto esser in commember dalla suprastonza. – Tals mirs ein sigl avegnend adina da tener en bien uorden e duei sur da quels vegnir tenu in protocol separau, essend che quels pon buca pli vegnir midai en classena da lenn.

## D. Lenna da nez e sia distribuziun

§57. Lenna da nez vegn ei dau ora regularmein ina gada per onn e quei entuorn miez matg entras la suprastonza u cumissiun forestala. Otg dis avon duei vegnir publicau il di, che vegn dau ora la lenna da nez. Sin quei di dueien tuts quels che garegian lenna da nez, haver observau il far urentar entras in commember digl obercheit ni il leutier predestinau persunal, il qual rapporta alla cumissiun ils petitiums, la quala ensemblamein concluda, tenor rapport e circumstanziass, conta lenna dar a scadin petent.



Quels aber che duessen negligir, d'haver dau en sil temps fixau, survegnan perquei onn negina lenna, resalvond en cass d'urgents basegns e nunprovedi. En tals cass po la cumissiun dar, mo ils petents ston pagar ultra dalla taxa, las spesas dalla cumissiun e da nudar ora.

#### Taxas dallas lennas ord schetgas frias

- |                            |                    |
|----------------------------|--------------------|
| 1. per in lenn da barschar | 1 tochen 10 frs.   |
| 2. per in lenn da slondas  | 10 tochen 20 frs.  |
| 3. per in lenn d'aissas    | 8 tochen 15 frs.   |
| 4. per in quader           | 4 tochen 6 frs.    |
| 5. per ina latta           | 1 tochen 1.50 frs. |

#### Ord schetgas cuminas

- |                           |                       |
|---------------------------|-----------------------|
| 1. per in lenn da fiug    | 1 tochen 5 frs.       |
| 2. per in lenn da slondas | 5 tochen 10 frs.      |
| 3. per in lenn d'aissas   | 4 tochen 7 frs.       |
| 4. per in quader          | 2 tochen 3 frs.       |
| 5. per ina latta          | 0.50 tochen 0.80 frs. |

#### Ord uauls cumins

- |                           |                       |
|---------------------------|-----------------------|
| 1. per in lenn da fiug    | 1 tochen 2 frs.       |
| 2. per in lenn da slondas | 5 tochen 6 frs.       |
| 3. per in lenn d'aissas   | 4 tochen 5 frs.       |
| 4. per in quader e posts  | 2 tochen 2.50 frs.    |
| 5. per ina latta          | 0.20 tochen 0.30 frs. |
| 6. per in pèr slusels     | 0.20 tochen 0.30 frs. |
| 7. per in lenn da clavau  | 1.50 tochen 2 frs.    |

§58. Slusels pon vegnir pinai mo en uauls cumins.

1. Quels pon era buca vegnir pinai gross per resgiar ni squadrar, sonder mo semegliants a quei ch'ils basegns damondan.
2. Pli che dua pèra per onn per fiug, aber buc in per l'auter, astga negin pinar. Igl abfall duei survir per currias e stadals.
3. Stadals eis ei buca lubiu da pinar.
4. Tgi che vul pinar slusels duei era dumandar la cumissiun, sinaquei ch'ei sappi vegnir teniu register en uorden.
5. Per scadin pèr slusels sto vegnir pagau, vide la sura taxa.

§59. Si da **Maun Sura**, sco era giu gl'**Uaul Surrein, Claus e Gieppia**, ei scumandau da pinar ora la lenna da feglia.

§60. Schaluns (*moni d'ina faultsch*) eis ei lubiu da pinar els uauls cumins senza pagar, adina aber mo rauba secca e mo dalla grondezia che drova per far schaluns e buca pli che per siu absolut basegns ni per forza far negozi cun quels.

Per geinas, scalas, gheislas etc., duei vegnir dau, ni schiglioc pinau negina lenna. Per chischar en las alps vegn medemamein dau negina lenna. Per begls d'aua els vischinadis duei vegnir dau lenna per nuot. Per begls ord ils vischinadis duei vegnir dau, pagond tenor taxaziun dalla cumissiun. Per begls mo da particulars duei vegnir dau negina lenna.

#### E. Determinaziuns generalas

§61. Tgi che cunterfa ad in uorden u l'auter, seigi el da tgei natira ch'el vul, croda en castitg e duei vegnir dalla suprastonza, tenor falliment e circumstanzias, vegnir curregius e struffegiaus. Stinai violents e surpassaders dueien era scharfamein vegnir censurai, aschia e sin moda, ch'ei

cunvegna a tals surpassaders buca pli da cuntinuar il cunterfar als uordens e statuts da vischnaunca.

§62. Scadin ei obligaus da nudar sia lenna, aschigleiti sco ella ei pinada cun sia noda casa, essend che lenna pinada e buca nudada croda tier alla vischnaunca.

§63. Il far da stiarner ei ellas schetgas strentgamein scumandau. – En auters uauls eis ei lubiu adina, aber senza uaffens e trer giu mo dischaunas (*roma*) e buca lattas, medemamein ei era il far dascha, rascha, scorsas, cavridar (*far giu la scorsa ad ina plonta giuvna*) ni far barba en tuts uauls stregn scumandau.

§64. Il far fiug en uauls ei scumandau sut gronds castitgs, aschia era dar fiug brutgs etc. Era cotgla astg'ei buca vegnir barschau els uauls, sco era buc ord quels, auter ch'en loghens dumandai dalla suprastonza.

§65. Els uauls, vul dir, ellas schetgas frias e cuminas, eis ei scumandau da far ora cuscha, sco era scumandau da far outra lenna secca, cun in plaid scumandau tut deno encurir si miscalgias.

§66. Els uauls cumins eis ei lubiu da far ora cuschas, encurir ensemen romas senza patrun, pinar draussa, dil rest giud pei, seigi verd ni sec, ei scumandau, sco il resgiar ora ragadas (*lenna derschida*), resalvond tala, che dess en l'aua. Duess ei aber schabegiar, che lavinias, seigi en schetgas ni uauls cumins duessen devastar ni en grond diember menar giu ellas auas, sche duei quei lura era esser scumandau a particulars da metter maun vidlunder, entochen che la vischnaunca ha buca concludiu tgei far cun tala.

## F. Classificaziun dils uauls

### a) Las schetgas frias e da reserva da Maun Sura

§67.

1. Uaul sur **Selva**, era **Uaul da Rosas** numnaus, anora giu ed anenasi, aschi lunsch sco quel va, ei schetga fria, ord la quala negin duei astgar prender ni pauc ni bia. Duess enzatgi selubir da pinar enzatgei ord questa schetga e fuss ei era mo ina bagatella, sche duei el stuer pagar 25 frs. ed ultra da quei aunc a norma dil frevel vegnir castigiaus dalla suprastonza scharfamein. Gnanc la suprastonza duei ver il dretg da dar ord questa schetga lenna agradi, senza cunsentiment da tuts vischins, cunzun dils da **Selva**. Quei che derscha duei vegnir priu e vendiu. Ei cheu aunc da remarcar che quels pegns, che sesanflan sin quella pastira, vendida al Vigeli, audien era alla vischnaunca, sco era quels che pudessen aunc crescher suenter.

2. La schetga da **Carmihut** e **S. Brida** sur via ora tochen il fil da **Sumsassi**, vul dir tut quei che penda dadens enagiu, ei schetga fria e sut las medemas leschas e grevezias, sco la sura schetga da **Rosas**. Quei che penda aber encunter la dado, po vegnir pinau lenna da clauder e schaluns, sco ei dretg; dapli per la punt da **Casti** e **Rueras** etc. – Quei uaul sut il stradun, naven da **s. Brida** tochen ora tier ils praus ei schetga reservada en gronds basegns.

3. **Uaul Liez**, enneu, ensi ed engiu aschilunsch sco el stauscha tochen ora la **Val da Pulanera** ei era schetga fria. En cass urgents e cun cunsentiment dalla suprastonza sa vegnir dau enqual lenn, mo la classena ei era en quel scumandada da prender.

4. Igl **Uaul Malamusa** neu encunter il sura, engiu ed ensi aschilunsch sco ei uaul e da l'otra vart da l'aua da **Mila** ei puspei schetga fria. Ord quella po vegnir dau enqual lenn grad en fetg gronds basegns.

5. Igl **Uaul Mila** sur ils **Bots** ha ses cunfins l'aua, il prau dadora si, igl **Uaul Flurin** ni **Spiz**, aschia tut quei che penda encunter ils **Bots** ed encunter la val, aschilunsch sco ei uaul ei schetga scumandada. - En quei uaul duei era vegnir pinau negina lenna ni secca ni verda. Las classenas dueien vegnir pinadas egl uaul dador il spitg digl **Uaul Flurin**.

6. Igl **Uaul Flurin** naven dil spitg digl **Uaul da Mila** sut ils praus e tochen sum, anora cumpriu **Tschuppina**, ils **Fistatgs** e tut **Londadusa** ed igl **Uaul Camischolas**, aschilunsch sco va igl uaul encunter **Surprau** e **Rodunda**, ei schetga fria reservada, pia po vegnir pinau lenna mo grad en gronds basegns e cun cunsentiment dils superiors.

7. La **Badugna** sur il vitg **Sedrun**, ton quella el prau, sco quella en la pastira, ei era schetga per schiarm dil vitg **Sedrun**. En quella duei vegnir pinau nuot, gnanc tortas. – Per scadin badugn da best, che vegn pinaus eis ei si il castitg da 25 frs., seigi el gronds ni pigns e per scadin buordi tortas 5 frs. e per il frevel, sco ils auters po la suprastonza struffegiar, sco ella vul aunc extra. La badugna, che sederscha da sesezza ed ei sin praus da proprietaris, po quel mintga gada prender per nuot, sil prau dil qual ella ei.

8. Egl **Uaul da Niregl**, naven dalla sura **Badugna**, sut prau e pastira, sura prau da **Cungieri** tochen ora sil fil, sco penda anen encunter il vitg **Sedrun**, eis ei era scumandau tut, resalvond igl encurir si miscalgias e zuar sut castitg da 25 frs. per scadina plonta, seigi ella era mo pintga e sut castitg dalla suprastonza. Ord quest uaul ha era la suprastonza negin dretg da conceder lenna, resalvond la derschida.

9. Naven dil spitg, quei che penda encunter la **Val Bugnei** tochen l’aua dalla val e tochen il **Drun en Val da Fistatgs** ei schetga reservada en cass da gronds basegns.

10. Si la **Val Bugnei**, naven dalla val e **Drun da Fistatgs** tochen si las **Foppettas** e surora aschi anenasi sco ei uaul, anora tochen la **Val Garviuts** ed engiu aschilunsch sco ei uaul e la mesa val ei schetga reservada en gronds basegns. En la **Tgamaura** ed en quels loghens per schiarm da baghetgs, duei vegnir pinau nuot.

11. Naven dalla **Val Garviuts** anora tochen **Udatsch** e prau sur il vitg **Bugnei** tochen sum e giu l’aua dalla **Val Bugnei**, aschia era tut quei che penda enneu encunter la **Val Bugnei**, ei schetga reservada en gronds basegns.

12. Naven dil sura numnau spitg anora tochen il **Fistatg l’Arschella**, ensi tochen il **Bostg**, ni aschilunsch sco ei uaul, engiu ils praus da casa u via nova, ei ad interim schetga serrada senza cundiziuns.

13. Naven dil **Fistatg l’Arschella** tochen ora sils cunfins da **Mustér**, ensi il **Bostg**, ni aschilunsch sco va nies uaul, engiu la via nova, ei schetga reservada.

NB. Scadina plonta che duess vegnir prida ord las avon menziunadas schetgas, ed ei buca schon avon cheu taxada, ha da pagar 15 frs., seigi la plonta verda ni secca, ni pusada e lura aunc a norma dil surpassament sut castitg dalla suprastonza.

14. La **Val Bugnei** sut la via nova da mintga vart tochen ils praus da **Druns**, ei schetga reservada en gronds basegns.

#### **b) Schetgas da Maun Sut**

1. Las **Vals** tochen ils cunfins da **Curnera**, l’aua da **Curnera** ed igl **Uaul Plaun Viradas**, aschilunsch sco el va, sco era da l’altra vart dalla aua ils **Tschalers** etc. duei esser schetga fria.

2. Igl **Uaul Nual** tochen ora tier l’aua da **Nual**, engiu toch’il **Rein**, ensi ed anen aschilunsch sco ei uaul, ei schetga reservada.

3. Naven dall’aua da **Nual** anora viers tochen la **Val Vallatscha**, serrau cun reserva en cass da gronds basegns.

4. Naven la **Vallatscha** tochen ora tier il dutg oradem **Plaun Sura**, naven dil **Rein** tochen sum igl **Uaul Gerau** tut, resalvond per manteniment dalla punt.

5. Naven la sura anora tochen ils fistatgs dadens la fontauna, ch'ils da **Surrein** retscheivan lur aua, taglia da **Rein** tochen sum, schetga reservada.

6. Naven dalla sura fontauna tochen ils praus da **S. Antoni** ensi, sco va la via dil **Tgom**, tochen il stavel, ei schetga reservada per diever dalla punt.

NB. Duess ord quei uaul era buca vegnir dau lenna da clauder, quella duess vegnir retratga ord **Nacla** etc.

7. A **Nacla** ei tutta badugna sur via en ed ora, seigi sin prau ni pastira schetga; aschia scumandau da pinar tut, era las tortas. Duess enzatgi selubir da metter maun vid quella, croda en fallonza da per scadin best 25 frs. e scadin buordi tortas da 5 frs. – Sederschan plontas, ch'ei sin praus da proprietaris per vegliadetgna ni entras suffel, sche crodan las concernentas mintga gada tier als proprietaris dils funs da quellas plontas.

8. Dadens ils praus da **Nacla** si tochen tier la via dil **Tgom** ed igl **Uaul Surrein** e toch'il stavel ed engiu tochen ils praus e l'aua da **Nalps** ed anen tochen **Pardatsch**, u la **Val Blaua**, ei schetga reservada; ordavon per la punt, la caltschina e la classena.

NB. A **Burganets** ei igl aschinumau **Uaul dils Gieriets** che ha atgnas determinaziuns

9. En **Pardatsch** dator la **Val Blaua** sur ils mises da stalter Gion Antoni Degonda e stalter Gion Rest Monn ei schetga fria per schiarm dils baghetgs.

10. Naven da **Plaun Schlaus** anora tochen ora la **Val dil Tscher** e sco il dutg entadem vegn giu il **Plaun dallas Cavorgias** tochen l'aua da **Nalps** e da bass en tochen la **Val Caltgera** u la **Punt Pardatsch**, quei ei serrau e reserva sulet per la caltschina e la punt.

### c) Schetgas ed uauls cumins

1. Igl **Uaul Stavelsecs** naven dalla **Val Blaua** tochen la **Val dil Drun** ni cunfins dall'Alp **Nalps**, naven da l'aua tochen sum, ei uaul cumin, resalvond sur ils baghetgs e la **Val da Stavels** e tut quei che penda encunter quella val tochen sum, ei schetga serrada per schiarm dils baghetgs.

2. Da l'otra vart dall'aua da **Nalps** dils cunfins da **Nalps** anora, numnaus **Plaun Schlaus**, ei uaul cumin. Entgins dretgs han ils proprietaris da **Nalps** en quei uaul.

3. Dil dutg u **Val Caltgera** dil **Rein** tochen **Plaun Pardatsch da Vaccas** ei schetga cumina per manteniment dallas punts e per baghegiar.

4. Naven dalla **Val dil Tscher** ed il dutg entadem il **Plaun las Cavorgias** anora tochen el **Varetg** e cunfins da **Medel** da mintga vart la **Val Giern**, sco nos cunfins van encunter **Medel** e **Mustér** ei uaul cumin. Reservau ord quei toc quei sur las tegias dalla **Regada (Rieda)** per schiarm dils baghetgs, aschia ei era vegniu serrau giu ils **Falluns** e **Punt Cavorgia Sura**, ei serrau per la punt, sco il spitg naven dalla purteglia va si encunter **Mises Pign** e dadens giu tochen l'aua dalla **Val Giern**.

5. **Val Vallatscha** dadens la **Regada (Rieda)** giu, duei esser serrau e scumandau da pinar lenna en quei uaul che penda da mintga vart encunter la val.

6. Igl uaul dalla **Val da Claus** dil maun da **Cavorgia**, sura praus da **Cavorgia**, sut l'aua da **Nalps**, dadens uaul d'artavels da stalter Gion Bistgaun Monn, dadens il spitg dalla punt si ed

ei sil maun sisum determinau giusum quei fop che vegneva bess giu lenna, anora encunter las **Caschatschas**, ch'ei era determinau, ei schetga fria.

7. Da l'otra vart dalla val encunter **Claus** eis ei scumandau da pinar quei che stat sur via, seigi en prau ni pastira e lenna da pegn ni da feglia; era sut via sin la pastira eis ei scumandau da pinar, seigi da tgei natira lenna ch'ei vul.

8. Finalmein **Gieppia**, che cunfinescha cun ils praus da **Rein** e da **Claus** e da **Surrein** e tochen **Rein** ei schetga fria e reservada.

9. Tutta badugna ni outra lenna dira, che crescha sin pastira, resalvond quella ord las fatgas schetgas, duei negin puder pinar per barschar, sonder sulet mo per diever e zuar per absolut agen diever annual e buca per vender ni far grondas provisiuns. – Cun tortas ord quels loghens po vegnir fatg negozi da scuas.

§68. Lenna che vegn concedida per diever da baghegiar e duess esser marscha, sch'ei il concernents obligai, sch'els vulan pretender per outra, d'enteifer 15 dis suenter che la lenna ei dada ora, far da saver quei als ugaus d'uaul u alla suprastanza; pertgei pli tard vegn lu da quellas varts priu negina notizia.

§69. Ils presents uordens d'uauls san vegnir midai da tut temps, bein aber sto ordavon la cumissiun d'uauls ponderar en uorden las midadas, che san vegnir fatgas ed era tedlar il meini dil bostger circuital e per lura san las necessarias midadas vegnir messas avon alla vischnaunca.

### **Ariguard la caltschina**

§70. La lenna per barschar caltschina vegn dada ora els loghens avon menziunai. Vegn il furnir caltschina alla vischnaunca daus via en accord, sche sto tut tgi che drova, prender dils accordants per il stipulau prezi e cundiziuns, sco la vischnaunca ei cun quels s'entelgida. Ultra da quei ston ils consuments aunc pagar alla vischnaunca en recumpensa dalla lenna per scadin salmè, ch'ei otg mesas brels, 50 cts.

Duess la vischnaunca, enstagl schar barschar en accord, schar sura da barschar als consuments, sch'ei quel era medemamein obligai da pagar alla vischnaunca 50 cts. il salmè.

Duessen ton ils sorprendiders, sco ils particulars, che lessan haver barschau caltschina e quella falless da maniera che quella vegness buca mesirada, sche ha la vischnaunca medemamein il dretg da far pagar ils 50 cts. per salmè, calculond ch'ei vess pudiu vegnir ora, bettend en bein tons e tons salmès.

NB. Quei ord raschun, che alla vischnaunca ei la lenna consumada, sco era ord raschun, che tgi che sa buca il mistregn, duei buca sorprendender.

### **Sur dils suloms**

§71. Tuts suloms ston vegnir dumandai, vulend baghegiar, seigi sin prau ni pastira.

§72. Suloms novs ni per carschentar suloms veders, duei a scadin burgheis da vischnaunca vegnir concediu sin pastiras, seigi baghegiar casas, nuegls e clavaus, mulins u auters baghetgs sper l'aua ni tegias ni puozs etc.

Adina aber cun la clara cundiziun senza esser en donn e pregiudezi d'in tierz. Era sin prau agen duei ei vegnir concediu da baghegiar, adina aber era cun la clara cundiziun, senza esser en donn e pregiudezi d'in tierz. Per suloms novs duei aber scadin che garegia ed obtegn tals, pagar en cassa da scola generala per sulom e regress per scadin fest ch'el drova 1 tochen 2 frs. Per scadin puoz 1 fr., aber mo quels che vegnan cavai ora sin pastiras.

Sulom niev sin prau duei pagar alla cassa da scola generala 50 cts. il fest sulom e regress. Ad jasters u buca burgheis da vischnaunca po vegnir concediu suloms mo sut las suandontas cundiziuns:

1. Per puder conceder in sulom ad in jester, seigi quel da tgei natira ch'el vul, sto ei esser 2/3 dils votants persuerter.

2. Medemamein sto ei era esser 2/3 dils votants per decider il con far pagar per ils suloms, che vulan vegnir concedi.

3. Duei quei mai daventar en donn e pregiudezi d'in tierz.

§73. Ord raschun ch'igl ei obligatoric da stuer baghegiar ils nuegls da crap, sche ha quei la consequenza ch'ils suloms veders ston vegnir carschentai, essend ch'ils mirs ein pli gross che las preits da lenn e ch'igl intern dil baghetg sa perquei tuttina buca vegnir restrenschiu, sche ha il proprietari il dretg da carschentar siu baghetg, nua che selai senza donn e pregiudezi dil contuorn, per ton sco ils mirs ein pli gross che las preits e zuar sut las suandontas cundiziuns:

1. Sch'igl ei encunter prau u regress d'auters, sche sto el quei ch'el drova, seigi per baghegiar ni regress, pagar raschuneivlamein. Nunsavend vegnir perina per il bia ni pauc, sche sto ei vegnir remess a dus ni treis umens e da quei che quels fan ora, sto scadin esser cuntents senza puder recuorer pli lunsch.

2. Era ariguard esser pregiudezi ad in tierz, duei ei, sch'ei duess schabegiar il cass, vegnir decidiu entras dus ni treis umens, ch'il pretendider e sedustader numnan in per in e sch'ei fa basegns pon quels dus lura trer tier in tierz sco „obman“. Quels treis duein cunscienzusamein e definitivamein decider e scadina part sto lura star tier quella decisiun fatga.

3. Sto quel che carschenta ses baghetgs, seigi encunter prau ni pastira, era pagar quei ton per fest alla cassa da scola generala tenor §72.

§74. Dapli ariguard il baghegiar, mira ellas leschas cantunalas.

#### **Sur digl urentar seivs, tetgs, lennas etc.**

§75. Igl obercheit duei inagada per onn urentar las seivs, tetgs, sco era sche las concedidas da baghegiar seigien en effect etc. Cun publicar otg dis avon, il di ch'ins vegni a far quellas visetas e quei duei daventar els emprems otg dis suenter ch'ins ha fatg mundi las cauras.

§76. Classenas e purtegliahs els vitgs, sco era nua ch'ils pasturs han d'ira atras, ston esser en uorden sil pli tard otg dis suenter far mundi ils tiers casa.

§77. Tgi che ha el termin dad otg dis suenter esser visaus buca reparau tetgs e classenas sufficientamein, croda danovamein el castitg primar ed aschia mintga otg dis vinavon cullas spesas vitier.

§78. Cura ch'ei vegn urentau seivs e tetgs, duei era vegnir mirau, che tutta lenna avon treis onns concedida da baghegiar seigi en effect. Per saver quei, vegn ei priu neunavon il protocol dalla lenna da diever dils treis onns e tratg ora quels che han via lenna e tier tgei els han dumandau quella e dau a mintga urentada in extract dil protocol.

§79. Per scadina plonta buca messa en siu effect, croda in tal el castitg da stuer turnar a pagar aunc inagada la lenna dumandada e buca messa en effect ed ultra da quei, tenor circumstanziass, aunc sut castitg dalla suprastonza e vulend puspei lenna per turnar a remplazzar la buca messa en effect, sto turnar a dumandar e pagar tenor taxa.

§80. Cun la medema caschun ein ils urentaders era obligai da far bein adatg sin seivs e mirs, che quels vegnan buca ruchegiai encunter pastira. Anflond tals e quals, che vessen veramein selubiu da ruchegiar quei culs auters resultats da quella missiun, duei quei vegnir rapportau alla vischnaunca per schar censurar.

§81. Tgi che arva ina geina ni fa giu ina purteglia cun dretgs e tuorna buca a serrar ni far si immediat, croda en castitg da 50 cts. per gada ed aunc sch'ei vegness cheutras fatg donn, quel reservaus e sut castitg dalla suprastonza.

§82. Era dueien ils medems urentaders culla medema caschun bein observar, che tutta lenna da diever, che vegn buca messa aunc quei onn en effect ni ei schon in onn sil plaz, seigi ni vegni immediat messa sut tetg. En cass cuntrari duei la lenna, suenter haver visau il patrun, vegnir vendida, sch'el ei buca vegnius suenter alla visada el termin dad otg dis.

**Ariguard il far giu lenna e cavegliar quellas, sco era ariguard il donn che savess vegnir caschunaus tras far giu quellas.**

§83. Il far giu lenna temps da fretg tras funs ei scumandau.

§84. Cura ch'ei vegn fatg giu lennas, duei ei vegnir mess in vigilader I:Wacht:I cunzun leu nua che quella vegn giu encunter vias, ni vitg etc.

§85. Tuts donns che vegnan caschunai tras il far giu lenna ni emplunar quella, ston vegnir bonificai sch'ei vegn garegiu da quels che han pigliau donn e lura aunc tratg els en censura.

§86. Emplunar ni metter e schar lennas sin funs d'auters po vegnir scumandau da quel che ha il funs. Vegn ei aber schau, sche duei el tuttavia, aschigleiti sco ei pudess far donn, dustar. Duess quei aber buca daventar avon s. Gieri, sche crodan talas lennas tier al proprietari dil funs, sco indemnisiun pil donn e per castitg dils negligents.

§87. Era igl emplunar lenna encunter vias duei adina daventar senza serrar si ni strenscher quellas memia fetg. Il metter lennas encunter mirs u seivs d'auters ni ses, ei era scumandau e quei ord raschuns ch'ils mirs e seivs vegnan tras quei tgunsch e bunamein adina lavagai ed era perquei ch'ils tiers san tras quellas plunas pli tgunsch vegnir els praus etc.

NB. La vischnaunca da **Tujetsch** ha aunc entgins particulars regulativs, ariguard il far fein a pastg, ariguard ils dretgs da schar pascular nuorsas, pors e cavals la primavera etc., ils quals ein buca pri si en las leschas antecedentas, secartend ch'ei fetschi buca da basegns.



Idilla spel begl odem il vitg da **Sedrun**